

Minister Mike de Meza:

Siman aki delegacion di CITGO mester bin pa sigui cu negociacionnan



ORANJESTAD - E aña 2016 a habri cu e posibel reapertura di refineria. Pero aña pasa na decem-

ber Sr. Rincon a wordo deteni y oposicion a reaccionar riba e situacion aki. Pa oposicion Sr. Rincon ta

e persona principal, pero minister di Financia Mike de Meza a informa cu tin delegacion di CITGO cu ta haciendo nan trabou y cu tur cos ta musta positivo.

Tin un delegacion di CITGO cu ta na Aruba cu techniconan. Di biaha nan a cuminsa cu nan trabou na refineria di cual ta den progreso. E delegacion ta trahando, unda cu minister tabata den comunicacion cu e ehecutivo di nan. Pero CITGO ta teniendo diferente reunion interno, di cual e siman aki nan ta caba cu e parti di reunion. Gobierno ta warda pa mita di e siman aki riba e delegacion cu

ta negocia e parti final cu ta e acuerdo definitivo lo ta aki na Aruba pa sigui cu e negociacionnan. Tur cos ta canando segun plan, e mandatario a bisa.

Ainda mester warda algun siman pa sa kico ta bay sosode. Aunke cu ta bisa esaki lo ta prome cu maart. Minister a bisa cu tempo total cu tin ta e prome tres lunanan di e aña aki. E negociacionnan mester ta cla no mas tarda cu 31 di maart, e mandatario a indica. "Ohalo nos por caba prome cu esey," el a laga di comprende. Tin diferente cu mester wordo regla den e traspaso di erfpacht, tin cambionan di ley cu tin cu tuma luga di cual mester bay parlamento. Lo

mester bay discuti cu parlamento riba e proposicionnan cu lo wordo poni riba mesa, pero tambe lo mester crea un compania estatal cu lo bira dura doño di e bienenan di refineria.

Tambe mester caba di sinta na mesa cu Valero pa e traspaso tuma luga. Tin diferente parti den e proceso cu mester tuma luga. E ta un proceso complicado y e ta un proceso cu ta tuma su tempo, e ta basta intensivo. "Eseyan ta canando. Nos tin e tres lunanan. Nos ta haci nos best pa caba dentro di e tres lunanan aki. Cada dia cu nos caba cu esey ta miho," e mandatario a indica. Tur cos mester bay segun procedura, segun proceso legal. □